

Parlament metta in accent giuvenil

Votants tanter 18 e 25 onns survegnan dapli infurmaziuns

■ **(anr/rgd) Per infurmar giuvenils a furma pli survesaivla ed attractiva ha il parlament grischun surdà per mauns da la regenza l'incumbensa d'introducìr la distribuziun da la brochura «easyvote».**

Questa brochura vegn redigida da giuvenils ed infurmescha davart ils temas da votaziun sin duas paginas A5. *Sandra Locher Benguerel* (sp, Cuira) ha inoltrà in'incumbensa per mobilisar dapli giuventetgna a las urnas.

Incumbensa per la brochura «easyvote»

«Tanter il 18avel ed il 25avel onn da vegliadetgna ha lieu per gronda part la socialisaziun en il sectur da la participaziun politica», ha ditg Locher. La necessitad d'auzar la quota da participaziun a votaziuns ed elecziuns è incontestada. La quota dals giuvenils che fan diever da lur dretgs è pli bass che tar autras gruppas da vegliadetgna. «In dals motivs per quest fatg è ch'il process sco er ils documents da votaziun e d'elecziun n'èn betg adattads a la giuventetgna. Blers giuvenils resentan la lingua politica sco memia cumplitgada e ch'ins dovria memia bler temp per s'infurmar», ha ditg Locher. Ina pussaivladad per promover l'interess politic da las votantas e dals votants giuvenils è l'introducziun da l'agid da votar «easyvote». Questa brochura vegn fatga da giuvenils e resumescha ils projects da votaziun sin duas paginas A5.

Regenza ha dubis furmals

Cusseglier guvernativ *Martin Jäger* ha gi chapientscha per l'intent da l'incumbensa, ha dentant fatg attent sin la problematica



Il deputà Tino Schneider (pcd giuvna, Cuira) s'engascha per l'avischiun da la politica e la giuventetgna.

FOTO G. N. STGIER

furmala. Ina brochura da terzs che vegn tramessa dal stadi stoppia esser furmalmain correcta, quai ch'il chantun na possa betg garantir en mintga cas. Latiers ha Jäger fatg attent a las structuradas politicas divergentas entaifer il chantun Grischun ed a l'instrucziun civica en las scolas dal chantun. La regenza ha perquai proponì al parlament da betg inoltrar l'incumbensa Locher. *Tino Schneider* (pcd, Cuira), il copresident da la pcd giuvna, ha gi nagina chapientscha per quest'argumentaziun: «La distribuziun da la brochura 'easyvote' a giuvenils en auters chantuns mussa ch'i na dat nagins problems en quest regard.»

Latiers vegnia che la brochura saja in agid da votaziun e na cuntegna naginas propostas da votar.

Ina brochura sco remedi?

Il deputà *Adrian Steiger* (pld, Trin) ha fatg attent ch'ina brochura dapli en ils documents d'elecziun na saja betg la dretga via per mobilisar giuvenils a l'urna. El ha proponì d'installar in'adressa d'internet da deviazion sin las paginas da las vischnancas. Er ses schef da fracziun, *Ruedi Kunz* (pld, Cuira), vesa la socialisaziun politica plitost en la famiglia ed en la scola. Il president da la citad da Cuira, *Urs Marti* (pld, Cuira), è

perencunter persvas ch'i saja impurtant d'integrar la giuventetgna gia baud en il process democratic politic. La citad da Cuira haja gia fatg bunas experientschas cun tals sforzs: «Senza las mesiras per ils giuvenils avessan nus cifras anc mendras.» Er *Cornelia Märchy* (pcd, Domat) era da l'avis che la brochura «easyvote» gidia ad auzar l'interess politic tar la giuventetgna. Il cussegl n'ha betg dà suatientscha a la regenza ed ha inoltrà l'incumbensa Locher per la distribuziun da la brochura «easyvote» a votantas e votants sut 25 onns cun 96 encunter 15 vuschs tar duas abstenziuns.